

Despues di a completa renobacionnan multi-miyonario **HILTON ARUBA CARIBBEAN RESORT & CASINO** **A CELEBRA RE-APERTURA DI E GRAN DAMA**



P'E ultimo 18 lunanan, Hilton Aruba Caribbean Resort & Casino a pasa dor di renobacionnan multi-miyonario extensivo, renobando tur aspecto, for di su kambanan y suites, te cu su restaurantnan, areanan comun y e hardinnan tropical.

Pa celebra e terminacion di e renobacionnan, e resort a tene un ceremonia special y desvelo e siman aki.

E ceremonia di reapertura di e resort a wordo teni den e lobby recién renoba di e Gran Dama, den presencia di e isla su Gobernador, Fredis Refunjol y su esposa, Minister di Turismo Mike de Meza, como tambe otro Ministernan gubernamental, miembronan di Parlamento, miembronan di prensa, e partnernan di e Aruba Growth Fund, representantenan di Hilton Worldwide y hopi di e 414 miembronan di ekipo di e resort.

E invitado di honor special n'e ceremonia tabata Oscar Henriquez, kende tabata entre esnan cu a concebi e hotel n'e prome instante. Como e isla su prome Diputado di Turismo na 1955, Oscar Henriquez a raporta na Minister di Finanza Juancho Irausquin, su partner den e decision pa introduci turismo na Aruba, den forma di un hotel di luho di cinco streya, diseñá p'e arquitecto Mericano

mundialmente famoso, Morris Lapidus.

Na edad di 90 aña, Oscar Henriquez a tabata honra hunto cu Gobernador pa oficialmente corta e cinta y declara e resort habri, net na ora p'e temporada halto di 2017.

E artista local Etty Toppenberg a entretene durante e prome parti di e recepcion cu a tuma lugar den oranan di mainta, y despues, Gobernador di nos isla a yega y e ceremonia oficial a cuminsa cu e cantamento di nos isla su himno nacional dor di Roderick Franken.

Rene Kan, representando Aruba Growth Fund a dirigi su mes n'e invitadonan, rindiendo homenahe den su discurso n'e isla su pioneronan di turismo, y n'e arquitecto di e hotel. Tambe el a gradici su partnernan di negoshi y inversionistanan, incluyendo anecdotan personal na varios momento durante su discurso.

El a reitera e compromiso solido di termino largo di su compania n'e proyecto y a pidi p'e confiansa di e miembronan di ekipo n'e hotel.

“Laga e ultimo aña aki t'e prome aña cu nos a inverti den bo confiansa pa fomenta nos reputacion; Ami y e otro doñonan y gerencia lo traha tur dia pa crea un reputacion di confiansa cu cada un di boso,” el a declara.

<Continuacion pag. 11>



<Prome parti na pag 10>

David Keys y Minister di Turismo tambe a dirigi nan mes n'esnan presente, dunando nan perspectivanan respectivo pa loke t'e renobacionnan di e resort y e futuro di turismo na Aruba.

Despues di esaki e ceremonia di corta e cinta a tuma lugar, cu 6 dignitario clave arma cu sker, esta Oscar Henriquez, Gobernador di Aruba, Rene Kan y Justus Martens di Aruba Growth Fund, Minister di Turismo y David Keys, VP di Benta y Mercadeo pa Americas, Hilton Worldwide, concluyendo na un manera simbolico e parti oficial di e mainta.

Un fiesta di cocktail a sigui na Sunset Grille Restaurant, sirbiendo tur specialidad di e resort su restaurantnan. Tournan personal di e propiedad, pa wak e kambarnan recién renoba, a wordo acompaña p'e gerente general di e hotel Olivier Maumaire y su ekipo.

Ora e Aruba Growth Fund a cumpra e hotel riba dia 15 di juli, 2015, e organisacion a duna e resort e nomber y marca nobo di Hilton Aruba Caribbean Resort & Casino, y durante e ultimo año y mey a pasa dor di renobacionnan, cumprando muebles y acesorionan nobo, y remodelando e kambarnan, gang, area comun y area di come, e areanan di piscina y playa, hardinnan, etc.

Awendia e t'e resort mas drecha riba e isla.

Durante e makeover extensivo, e doñonan kier a celebra e hotel su historia fantastico, y a dicidi pa tene un competencia pa hende local y turista, puntrando nan pa manda nan mihor potretnan di e hotel for di e añanan 50 y 60. E potretnan ganador a wordo engrandeci y awor ta colga den e lobby, liftnan, gangnan y e 357 kamer y suitenan.

Den su vision p'e resort, Rene Kan a declara: "Mi ta hopi anima pa wak e futuro di e hotel aki. Mi ta mira un resort cu t'e top destinacion di biahe na Aruba. Mi ta mira un lugar unda nos coleganan ta bin traha y ta sali tur dia cu un sonrisa riba nan cara.

Mi ta mira un hotel cual tin un lugar den historia cu no por wordo lubida, pero cu tin un futuro cu ta un parti integral di nos cas riba e isla."

El a conclui su presentacion positivo na nomber di su partnernan Justus Martens y Milton Berlinski, y a gradici tur hende cu a pone nan confiansa den e ekipo di doñonan, primintiendo pa traha hunto pa crea un bunita experiencia pa cualkier persona cu ta bishita e resort y e isla fantastico di Aruba.